

共同經課-1 民數記二十一章四節～九節

4 in 對何珥山起身，對紅海的路去，欲窺以東的地。百姓為著所行的路，心不止餒志，5 就嫌上帝及摩西講：「恁啥事導阮出埃及、互阮死佇此個曠野啊？因為無餅，無水，阮的心厭賤此個清淡的食物。」6 耶和華就差火蛇入百姓的中間，咬百姓。以色列人死多多。7 百姓到摩西遐，講：「阮有犯罪，因為阮有嫌耶和華及你。請你求耶和華，互諸個蛇離開阮。」摩西就替百姓求。8 耶和華對摩西講：「你做一尾火蛇，掛佇旗杆頂；見若互伊咬著的，一下看，就會活。」9 摩西就做一尾銅蛇，掛佇旗杆頂；見若互蛇咬著的，一下看此個銅蛇就活。

共同經課-2 詩篇一〇七篇一節～三節，十七節～二十二節

1 恁著感謝耶和華，因為伊是好；因為伊的慈愛永永佇啲！2 耶和華所救贖者著講這話，就是伊對對敵手中所救贖者，3 對逐國，對東對西，對南對北，所聚集的攏著按呢講。17 戇人因為 in 的過失，閣因為 in 的罪惡受苦楚。18 in 的心厭惡逐樣的食物，就倚近死的門。19 in 就佇苦難中哀求耶和華；伊對 in 的患難中牽救 in。20 伊出命令醫好 in，救 in 脫離死無。21 為著耶和華的慈愛及伊對世間人所行的奇事願人攏謳啉伊。22 亦願 in 獻感謝的祭，出歡喜的聲講起伊的所做！

共同經課-3 以弗所書二章一節～十節

1 閣恁平素對恁的過失恁的罪過來死的，伊也曾互恁復活。2 是恁前行佇彼中間，趁此世間的風俗，及空中掌權的君王，就是現今運行佇悖逆的人彼個神。3 其中阮前也攏佇阮肉體的私慾啲行做，趁肉體及心內的意思，生成是做通受氣的，親像別人一樣。4 總是，上帝的憐憫真豐盛，為著伊疼咱的大仁愛，5 當咱對過失已經死的時，就互咱及基督同活。恁對恩典得著救。6 也互咱佇基督耶穌及伊同起來，同坐佇天裡，7 閣對伊佇基督耶穌所賞賜咱的仁慈，欲佇後世代顯明伊恩典的極富有。8 因為恁對恩典得著救，是對信；這也毋是出佇恁本身，是上帝所賞賜；9 毋是出佇所行，免得人誇口。10 因為恁是伊所做成的，受創造佇基督耶穌；來行好事，就是上帝代先備辦的欲互咱行伊。

共同經課-4 約翰福音三章十四節～二十一節

14 閣親像摩西舉起蛇佇曠野，人子亦的確著按呢受舉起，15 互見若信的人恁佇伊有永活。16 「因為上帝將獨生的子賞賜世間，互見若信伊的人，袂沈淪，會得著永活，伊疼世間到按呢。17 因為上帝差子入世間，毋是欲審判世間；是欲互世間對伊得著救。18 信伊的人，無受審判；毋信的人，已經受審判，因為伊毋信上帝獨生子的名。19 所審判的，就是光入世間，亦人愛暗卡過頭佇光，因為伊所行是歹。20 見若做歹的怨恨光，亦毋就近光，驚了伊的所行受責備。21 獨獨行真理的人就近光，來顯明伊的所行是佇上帝來行。」